



**Á atención dos grupos municipais da corporación (PSOE, PP e BNG) e  
a Secretaría Xeral do concello**

Ferrol en Común comunica a modificación da súa moción relativa á **inmediata retirada do busto de Juan Carlos I da fachada do concello** e que se recolle coma 1º punto na orde do día da continuación do Pleno Ordinario de Xullo convocado para o vindeiro xoves 13 de agosto ás 10.00 horas.

Ademais da emenda á moción que este grupo municipal pretendía realizar «in voce» no propio Pleno Ordinario o pasado 30 de xullo para solicitar a maiores a retirada da medalla de ouro outorgada pola corporación a Juan Carlos I, e que aproveitamos para deixar constancia e comunicar a través deste escrito, tamén levaremos a cabo as seguintes modificacións, aumentando tanto o contido da moción coma as peticións finais da mesma:

Á vista dos últimos acontecementos nos que a Casa Real comunicaba a intención do rei emérito Juan Carlos I de Borbón de abandonar o territorio español ante a polémica xerada polo que considera “acontecementos pasados da súa vida privada”, episodios que deron lugar ao inicio de investigacións penais primeiramente en Suiza, e despois a iniciativa da Fiscalía do Tribunal Supremo español, debido a súa condición de aforado.

O ex-xefe do Estado estaría presuntamente implicado en delitos de corrupción, branqueo de capitais e evasión fiscal continuada e de enormes dimensións, que só poden comprenderse pola práctica sistemática de amplos sectores do poder político, institucional e mediático de mirar cara outro lado en todos os asuntos que teñen que ver coa Casa Real e a monarquía.

As actividades do rei emérito distan, e moito, de ser un caso puntual e privado. A sucesión de acontecementos evidencia que a Casa Real acumula toda unha serie de actos ilícitos que sitúan á monarquía española moi lonxe do seu pretendido comportamento “exemplar”, tan manido como falso.

Que a Xefatura do Estado sexa un cargo hereditario, no que ademais os varóns gozan de prioridade na liña sucesoria, é unha anomalía democrática e un anacronismo feudal sobre o que a cidadanía nunca tivo opción de decidir: a monarquía é unha institución imposta polo franquismo tras case 40 anos de ditadura iniciada cun golpe de estado á República.

A complicidade dos partidos dinásticos do réxime do 78 coa monarquía, incluíndo a actual Presidencia do Goberno, resulta escandalosa. Non só se infantiliza á cidadanía furtándolle a posibilidade de decidir sobre unha institución imposta pola vía das armas, senón que se colabora activamente na opacidade, a falta de transparencia e o mantemento dos privilexios de quen utilizou os recursos públicos e o ben común no seu propio beneficio.

O descrédito da monarquía xa se converteu nun clamor popular, porque pon en cuestión o propio funcionamento da democracia e da xustiza. Cómpre tomar medidas que permitan á cidadanía recuperar a confianza nas institucións e poderes públicos.

Por todo iso, o Grupo Municipal Ferrol en Común presenta ao Pleno para a súa aprobación se procede os seguintes ACORDOS:

1. Esixir a celebración dun referendo no que a cidadanía decida sobre a continuidade da monarquía como depositaria da Xefatura do Estado.
2. Condenar a fuxida do rei emérito cando está a ser investigado pola Fiscalía do Tribunal Supremo.
3. Instar ao Goberno do Estado e ao Congreso das Deputadas a que inicien unha investigación parlamentaria polas accións realizadas por D. Juan Carlos de Borbón dende o ano 2014, momento no que deixou de manter a súa condición de inviolabilidade xurídica.
4. Instar ao goberno do Estado a derrogar o delito de inurias ao rei e á Casa Real recollidos nos artigos 490.3 e 491 do CP, igualando a protección penal da honra desta figura e institución coa resto da cidadanía.
5. Esixir, de probarse os delitos que se investigan, o reingreso as arcas públicas do patrimonio adquirido ilegalmente polo rei emérito.
6. A retirada da medalla de ouro outorgada pola corporación a Juan Carlos I de Borbón e de calquera outra honra ou título honorífico que ostente na cidade de Ferrol.

Ademais, do solicitado na moción orixinal coma punto único:

- A retirada do busto de Juan Carlos I da fachada do Concello e o seu traslado e almacenaxe no espazo habilitado para tal fin no Centro Torrente Ballester.

Ferrol, 12 de agosto de 2020

Jorge Suárez Fernández

Voceiro do Grupo Municipal Ferrol en Común